



## **Directivas davart la finanziaziun speziala "sport" concernent contribuziuns a projects generals per promover il sport**

Sa basond sin l'art. 31 lit. a da l'ordinaziun davart la promoziun dal sport e dal moviment (ordinaziun da promoziun dal sport) dals 7 da fanadur 2015,  
relaschadas dal departament d'educaziun, cultura e protecziun da l'ambient ils 19 d'avust 2015

---

### **Art. 1 Contribuziuns**

<sup>1</sup> Contribuziuns pon vegnir pajadas per projects che promovon il sport en il chantun Grischun, en spezial per projects che promovon il sport da giuventetgna.

### **Art. 2 Exclusiun da contribuziuns**

<sup>1</sup> Exclut da survegnir contribuziuns è:

- a) projects che promovon il sport e che servan ad ademplir las obligaziuns legalas da dretg public;
- b) projects da caracter commercial;
- c) projects che vegnan subvenziunads sur la contribuziun pauschala annuala en il rom da l'activitad normala da la federaziun;
- d) personas cun dretg da survegnir contribuziuns tenor l'artitgel 12 litera d da l'ordinaziun da promoziun dal sport.

### **Art. 3 Inoltraziun e tractament da las dumondas**

#### **a) adressat**

<sup>1</sup> Las dumondas ed ils documents per survegnir contribuziuns ston vegnir inoltrads al post ch'è inditgà sin il formular da dumonda correspondent.

### **Art. 4 b) agiuntas**

<sup>1</sup> A la dumonda ston vegnir agiuntads ils suandants documents:

- a) formular da dumonda;
- b) plan dal project inclusiv finamiras;
- c) plan da finanziaziun inclusiv contribuziuns dal maun public e d'organisaziuns turisticas;
- d) dus cedels da pajament.

### **Art. 5 c) termin d'inoltraziun**

<sup>1</sup> Dumondas per survegnir contribuziuns ston vegnir inoltradas avant il cumenzament dal project (decisiva è la data dal bul postal resp. da l'e-mail).

<sup>2</sup> En dumondas inoltradas cun retard na vegni betg entrà.

#### **Art. 6 d) decisiun davart contribuziuns**

<sup>1</sup> Davart la concessiun da contribuziuns fin 50 000 francs decida il departament d'educaziun, cultura e protecziun da l'ambient a maun dals custs imputabels.

<sup>2</sup> Davart la concessiun da contribuziuns da passa 50 000 francs decida la regenza a maun dals custs imputabels.

<sup>3</sup> La concessiun da contribuziuns vegn communitgada en scrit directamain a las petentas ed als petents.

#### **Art. 7 e) documents da rendaquint**

<sup>1</sup> Suentar la finiziun dal project ston vegnir inoltrads ils suandants documents:

- a) rapport detaglià dal project;
- b) evaluaziun dal project inclusiv ina cumprova che las finamiras èn cuntanschidas;
- c) rendaquint detaglià.

#### **Art. 8 f) examinaziun dals documents da rendaquint / fixaziun definitiva e pajament da la contribuziun**

<sup>1</sup> Il rendaquint vegn controllà da l'uffizi per la scola populara ed il sport.

<sup>2</sup> Sche quai vegn fatg valair en la dumonda da contribuziun, pon fin ad 80 pertschient da la contribuziun garantida vegnir pajads directamain suenter il cumenzament dal project.

<sup>3</sup> Davart l'autozza e davart il mument da pajaments parzials decida l'istanza cumpetenta, cur ch'ella dat la garanzia da contribuziun.

<sup>4</sup> La summa restanta vegn pajada suenter l'examinaziun dals documents da rendaquint, premiss che las finamiras dal project, ch'èn descrittas en il plan dal project, sajan cuntanschidas.

#### **Art. 9 g) scadenza dal pajament da las contribuziuns**

<sup>1</sup> La contribuziun garantida da la finanziaziun speziala "sport" scada 2 onns suenter la fin dal project planisada.

#### **Art. 10 Cundiziun**

<sup>1</sup> Il pajament da contribuziuns a favur da projects generals per promover il sport è collià cun la cundiziun da represchentar las marcas «grischunSPORT» e «Swisslos» en moda adequata. Bandieras u models da stampa correspundents pon vegnir retratgs dal post ch'è inditgà sin il formular da dumonda.

#### **Art. 11 Recurs**

<sup>1</sup> Cunter las decisiuns dal departament respectivamain da la regenza poi vegnir fatg recurs tar la dretgira administrativa dal chantun Grischun, Obere Plessurstrasse 1, 7000 Cuir, e quai entaifer 30 dis dapi la comunicaziun da la decisiun contestada.